



AV PROCES D'ENTRE MAISTRE

*Iean Valet, Prieur de Bere, & Maistre François Pigeon
pretendant droit en iceluy sont les prouisions de Maistre
Thomas de Lorie, resignataire de Maistre Iean de Gasnes
& celles dudit Valet resignataire dudit de Lorie.*



De Lorie est pourueu par le Reuerend Euesque de Paris ou son grand Vicair, en consequence d'un Arrest du Parlement de Paris, du 17. Auil, 1590. à cause de l'empeschement fait à Rome.


On ne peut obiecter contre c'est Arrest & prouision qu'ils soient poursuiuis deuant vn Parlement & vn Euesque, au ressort ou Diocese desquels vn benefice ne soit situé.

Car Pigeon en la requeste par luy présentée au Conseil, à fin de cassation dudit Arrest, dict que de Lorie estoit de la Ligue. Or en l'an 1590. il n'y auoit encor de Parliament estably en Bretagne par ce party, ains seulement sur la fin de l'an 1591. & en ceste année 1591. il n'y auoit point de grand Vicair estably à Nantes, pour l'absence de Monsieur de Nantes qui estoit auprès du Roy, ains il en fut institué vn en l'an 1592. seulement par le Cardinal Caëtan. Et tout cela se iustificera par escrit, & *una voce* de toute la Bretagne.

De Lorie donc est allé au plus prochain Parlement, & à vn Euesque de son party, d'autant que par autres il eust esté refusé, pris prisonnier & mal traité: ioinct que Sansay Banquier demeurant à Paris ayant ses pieces, & receu vne procuration de luy, a fait ceste diligence & c'est pourueu le plus valablement qu'il à peu en vn temps si miserable pour conseruer son droit.

Quant au tiltre dudit Valet: il a premierement vne signature de l'an 1593. *in forma gratiosa*. Et s'il n'apert de la profession de foy, la présence & domesticité d'un Cardinal seruent d'excuse: d'autant qu'il a esté examiné à Rome par les examinateurs deputez, & s'il eust leu Bulles il en paroistroit: mais on l'a gratifié de la signature laquelle iussist en France pour disputer le possesseur d'un bene-

A



fice, & notamment *in patria obedientia* qui est la Bretagne c'est l'expresse doctrine de Rebuffe, *gl. 4. num. 16. 17. & 18. ad reg. de subrog. collatig.*

Ioinct que les Banquiers en verifiant ladicte signature en ont offert faire expedier Bulles sur icelle, preuue certaine qu'elle est bien expediee & en bonne forme, & tous les Banquiers attesteront que quand vn titulaire peut par grace obtenir signature d'un benefice subiect à Bulles, elle s'expedie en la forme de celle dudit Valet, & non autrement.

Il a vne nouuelle cession de l'an 1598. à fin quel'on ne peust luy obiecter que la premiere fust expediee pendant les defences d'aller à Rome.

Ne nuist qu'en ceste derniere il y aye vne clause de deuolut contre ledit de Gasnes, par ce que iamais ledit Valet ne s'est aydé de la signature, & n'a pris possession en vertu d'icelle, s'en seruant seulement pour couvrir ce que le malheur des guerres auoit presté de moyen pour disputer la premiere.

Il y a plus, ce deuolut ne fait pas que Valet confesse la possession de Degasnes *in vim tituli*, mais il est obtenu pour d'estruire toutes les pretensions de Degasnes à cause d'une intrusion de sa part, *sine titulo*, & voicy vn point auquel il n'y a point de response.

Ceste nouuelle cession est de l'an 1598.

De Gasnes auoit resigné à de Loric en l'an 1589. resignation effectuee, possession prise.

De Gasnes a encor resigné à Monsieur Faucon en l'an 1590. resignation effectuee, possession prise.

Depuis l'an 1591. iusques en l'an 1596. tous les trois titulaires au fort des guerres ont pris les fruiets, mais la possession des vns & des autres ne leur sert ne nuist, d'autant que ce qui s'est passé en ces années ne peut estre tiré en auantage apres la paix.

Cependant Monsieur Faucon & de Gasnes ont eu procez pour la resolution de certain concordat d'entr'eux iugé à Rennes en l'an 1596. ou par sentence du Presidial dudit lieu confirmée par Arrest, il est dict qu'ils obtiendront nouuelles prouisions pour rentrer en leurs droicts.

En l'an 1600. de Gasnes a enuoyé a Rome, en l'an 1601. il a eu Bulles que Pigeon produict, il a donc reconnu la sentence & l'Arrest bien donnez y ayant obey, & par consequent a confessé qu'il n'auoit point de tiltre pendant ledit temps.

Neantmoins esdictes trois années iusques à la paix, il a iouï du-
dit Prieuré, si bien que voila vne intrusion verifiée par la partie
mesme sur laquelle intrusion estoit principalement fondé le de-
uolur auquel on a adionsté autres clauses, notamment de la confi-
dence par ce que depuis l'an 1584. iusques en l'an 1589. de Gafnes
a presté son nom à vn nommé Pigeon Maison-neufue, ayeul du-
dit Pigeon, & depuis ladite année 1596. le Gentil-homme qui so-
licite à present le procez a iouï sous son nom.

Qu'elles clauses ne vitient point ladite cession, par ce que *tituli
diuersi imò contrarij cumulari possunt.*

Mais Pigeon diét que les tiltres de Valet ne sont point insinuez,
il respond à cela que le miserable temps en est cause, & adionste
que c'est l'interest du Greffier des insinuations & non de la partie
puis que d'ailleurs les tiltres sont bons, & verifiez tels par les Ban-
quiers.

Outre ce que Pigeon n'a aucun droict au benefice que à cause
de la pretendue reuocation faicte par de Gafnes: si le defect d'in-
sination est suffisant pour la rendre nulle; Ce procez est vuidé,
car ceste piece n'est point insinuée & par consequent il n'y a point
de reuocation, si bien que le tiltre de de Lorie demeure, sans auoir
esté reuoqué, & sans que Pigeon posterieur resignataire puisse rié
pretendre au Prieuré contentieux.

Pour le regard des inscriptions en faux, l'instruction du procez
sur l'accusation en verifiera la calomnie, outre ce que de Lorie a
peu non *adepta possessione resignare*, & sert seulement cet acte au
procez pour tesmoigner son acceptation, sans qu'il fortifie son
droict, acquis audit Valet par sa resignation.

Monsieur l'Aduocat Rapporteur.



